

Sawcuengh Daeujdaengz Hagdangz Iq

壮文来到小学堂

——Geiq Vujsenh Yen Gyaulyozdenj Hagdangz Dungzlingj Cin Siengzlungz Siujoyz

□Ganh Sozvwz Coub Vangzyungz Lij Cin



▲ Hagseng guh seiq vunz haizgiegraez buetvaiq doxdax.

▲ Doihhabciengq hagdangz camgya ndaw cin ciengqgo doxdax.

◀ Boudaeuz hagdangz yiengq lingjdauj lauxhangz baihwanz gaisau gij cingzgvang hagdangz.



▲ Gwnz dangz Sawcuengh hagseng hae ndaei angvanez.

Siengzlungz Siujoyz dwg Dungz-lingj Cin aen gyaulyozdenj ndeu, caeuq cunghsinhyau doxgek yae caet cienmij. Gangj aen hagdangz neix "iq", dwg aenvih gizneix hagseng iq, saeseng noix. Aen hagdangz de cijdwg aen gyaulyozdenj ndeu, cij banh 1 daengz 3 nienzgaep, cijmiz 3 aen ban, 96 boux siujhagseng, lauxsae hix ngamq miz 6 vunz. Aen gyaulyozdenj neix daj 2013 nienz 9 nyied hwnj ngamq hainduj guh Cuengh Gun song saw vah sonhag.

Siengzlungz Siujoyz aen hagdangz iq neix suenhag dauq lai gvangq, ciemqdieg 10073 bingz-fuengmij, ranzlaeuz 1216 bingz-fuengmij. Aen hagdangz iq de faex heu va maeq, gingjsaek gyaunde, dwg aen gyoivenj lwghag baenzcaiz ndeu. "Roeglaej yienznaeuz iq, daepdaw hix miz caez", Siengzlungz Siujoyz laeuz moq ranz rongh, banban miz bwzbanj, banban doeng gvangjbo, ranz comzsaw, ranz yawjsaw, ranz yizgi, ranz gohyoz sizyen, ranz dijuuz gicaiz, ranz meijsuz…… doenghgij doxgaiq sonhag gig caezcienz. 6 boux lauxsae bouxboux cungj dwg siujoyz gaugaep lauxsae, yozliz hix cienzbouh habgek, baihindaw miz 3 boux dwg gungcanjdangjiyenz, 4 boux bwnjgoh yozliz.

Siengzlungz Siujoyz cienzmienh saedhengz gyaulyuz fanghcin, haenqrengz daezsang sonhag cizlieng, banh daegsaek siujoyz lajmbanj. Aen hagdangz iq neix dawz "gaghag, gagleix, gaggamq, gaggiengz" guh yauyin, dawz "doxgiet, vwnzmingz, haiguh, cauxmoq" guh yaufungh, dawz "yiemzsuk, gyaezseng, guh-saed, sugson" guh gyaufungh, dawz "gaenxhag, sugngeix, gouzsaed, baenaj" guh yozfungh, yawjnaek minzcuz vwnzva gyaulyuz, yawjnaek Cuengh Gun song saw vah sonhag, haeujsim hagseng fazcanj, sawj

hagseng yawjraen maqmuengh, gamj-souh angqyangz.

Geij bi neix daeuj, aen hagdangz iq neix sonhag cizlieng daezsang gig vaiq, haujlai baez bingzbeij doxdax ndaej baiz youq daengx cin baihnaj, ndaej daengz vunz lai haenhndei. Dah hagseng Veiz Ciuhdinzh 2011 nienz camgya daengx yienh ciengqgo doxdax ndaej ngeihdaengjciengj, 2012 nienz caiq camgya doxdax youh ndaej itdaengjciengj. 2012 nienz hagdangz bingz ndaej daengx cin sonhag guenleix samdaengjciengj. 2013 nienz doihciengqgo hagdangz ciengjndaej daengx cin ciengqgo doxdax daihhaj mingz.

Daegbied sawj vunz lai gamj-daengz miznaj dwg, 2015 nienz 11 nyied, Siengzlungz Siujoyz daibyauij daengx yienh 74 aen gyaulyozdenj ciepsouh swicigih yivu gyaulyuz dox-daengh fazcanj bingzguj niemhsou. Gyoengq conghyah cungj haenh aen hagdangz iq neix banh ndaej ndei, sonhag miz minzcuz daegsaek. Siengzlungz Siujoyz vih daengx yienh swnhleih doenggvaq swicigih niemhsou ok rengz hung lo.

Doiq Cuengh Gun song saw vah sonhag, Siengzlungz Siujoyz bouxfucwz Luz Vwnz yienghneix naeuz: "Hagseng angq hag Sawcuengh, Cuengh Gun cungj rox ceiq ak!"



▲Hagdangz vanzging sonhag gyaunde caemdingh.



▲ Dangz goq Sawcuengh hawj hagseng lai doengh' uk doenghfwngz.



▲ Diegsuen hagsib ndaej raen gij cingzciik ndei hagseng.



▲ Hagdangz guh ndei hong goqgaj hozdung.



▲ Gyoengq lauxsae doxcomz guh gyaulyenz.



▲ Lauxsae son hagseng hag Sawcuengh.